

T1742/48220(9)

03

管窺輯要

九

太微垣星圖
 太微垣總論
 太微垣說
 太微垣歌
 太微垣考
 太微垣 別本參考
 占太微垣
 太微垣諸星去極度數考
 太微垣列座 干紀附占
 天市垣星圖

天市垣論
 天市垣說
 天市垣歌
 天市垣考
 三垣附錄
 天市垣 別本參考
 列宿
 附官
 占天市垣
 中外官占

THE CHINESE-JAPANESE LIBRARY
 OF THE HARVARD-YENCHING INSTITUTE
 AT HARVARD UNIVERSITY

MAR 1 1954

天漢
 占例
 天市垣諸星去極度數考
 天市垣列座

共廿七

管窺輯要卷之十九

六安黃 鼎玉耳父纂定

哈佛大學哈佛藥宗
圖書館珍藏印

男九命簡臣

侄九錫公位

九疇倫叙

九如眉介

侄孫珮琢成

到先鳴

桐城方兆及子詒全閱

太陰門也第四星曰上將總之謂四輔也端門西
一星曰右執法御史大夫之象也右執法之西右
掖門也右掖門之西南第一星曰上將其北西太
陽門也第二星曰次將其北中西華門也第三星
曰次相其北西太陰門也第四星曰上相總之亦
四輔也王應電作端門左掖門東華門東中華門
太陽門右掖門西華門西中華門太陰門共九門
更詳之兩藩均平大小有常則吉明盛有芒及搖
動諸侯謀天子若執法移則刑罰尤甚兩藩開則

兵起月與五星順入太微軌道則吉蓋七曜心遵
黃道歷天街歲一受事太微而出猶大臣受天子
之命於朝以行其職也其逆入若不軌道則凶如
犯帝座是謂犯中座則戒刑金尤火甚

謁者一星在左執法東北主贊賓客即所謂司士
擯孤卿特揖者占若不見外國不盡賓服

三公在謁者東北曰三公內座朝會之所居也及
常朝者張衡云以輔弼帝者其占與北斗下之三
公同居

九卿三星在三公北曰九卿內座主治政事乃常朝者占明大芒角天下獄訟若暗則紀綱亂不見則政亂與天紀同占

五諸侯在九卿西乃諸侯入覲者或內侍天子者不之國也辟雍之禮得則太微之五諸侯明若暗則諸侯受殃動搖則藩臣擅命以干王者

五帝座在內屏北天子日出視朝之處其中爲黃帝內座在太微中含樞紐之神天子動得天度止得地意從容中道則五帝座明而光若暗則人主

當求賢輔治否則勢奔又曰太微五帝座小若青黑天子國亡星家言四帝夾黃帝中座東方星蒼

帝威靈仰之神也南方星赤帝熯怒之神也西方星白帝招矩之神也北方星黑帝協光紀之神也張衡云五帝同明則天下歸心否則失位金水火入順軌道則吉或謂天一而帝五何也曰此不過借主宰之名以言五行之氣各有攸統耳

內屏四星在端門內近右執法內屏設於路門諸侯入自應門則天子寧立其前也屏所以擁蔽帝

庭也天子外屏諸侯內屏此太微垣亦云內者對
婁宿之外屏而言於義未安但當云屏星是也明
潤則君臣有禮

幸臣一星在帝座東北天子親近之臣若周禮內
監之屬可以當之古者天子侍御僕從罔非正人
然則幸臣之名變於後代耳占微細吉明則幸臣
用事

太子一星在從官東儲貳之星乃監國者故列位
焉若北極前星爲太子主居大內者而心之前星
爲太子乃東宮所生之地也明潤則太子賢芒角
動搖及金火守入則太子廢不然或有篡逆之事
從官一星在太子西北卽司士所掌從者占暗則
帝不安如常則吉

郎將一星在郎位東北主閱具所以爲武備張衡
云今左右中郎將也芒角則將怒不可當也郎官
十五星而郎將止一星天之右文可見矣

郎位十五星在帝座東北一曰依烏郎府周之元
士漢之光祿侍中散騎諫議郎三署郎中是其職

也張衡云今尚書郎也大小相均光潤有常吉隋志云郎位主守衛也明大則臣劫主又曰客星犯入大臣爲亂星不具后死

常陳七星如畢狀在郎位北天子宿衛之士儀仗之設以禦強也搖動則天子自出明則武兵用微則武脩弱

明堂三星在太微西南角外天子布政之宮也明吉暗凶

靈臺三星在明堂西占候之臺主觀雲物察符瑞徵災祥亦宜壅蔽而舒鬱滯也暗則陰陽不和與司怪同

虎賁一星在西藩之外上將之西下台之南旄頭之騎官卽司士所掌王族虎士太僕太右等官也張衡云主侍從之武臣也與車騎同占

三台六星兩兩相比起文昌列招搖太微一曰天柱一曰三能音台孟康曰在北斗第六星旁在天曰三台在人曰三公主開德宣符也解者不一要之主臣位上台公侯中台卿伯下台子男大夫也西

近文昌二星曰上台爲司命主壽次二星對軒轅
曰中台爲司中主宗室東二星抵太微曰下台爲
司祿主兵所以昭德塞違也又曰三台爲三階太
微躡以上下一曰太階上階上星爲天子下星爲
女主中階上星爲諸侯下星爲卿大夫下階上星
爲士下星爲庶人所以和陰陽而理萬物也色齊
明則君臣和法令平不齊爲乖戾明近則輔臣親
強斥小則疏弱動搖金火守入兵起彗孛守之尤
甚一曰台失常災在三公晉志惠帝元康元年三
月中台星折折者裂也又曰上台司命爲太尉中
台司命中爲司徒下台司祿爲司空六符者六星
之符驗也上台舊在井唐志測在柳中台舊在七
星唐志測在張又曰中台二星爲奄奄者疏濶也
少微四星在太微之西方南北相列賢人在下僚
者亦東宮官屬也一名處士亦天子副主或曰博
士官一曰主衛掖門其南第一星爲處士第二星
爲議士第三星爲博士第四星爲大夫若明大而
黃則賢才舉月與五星犯守則處士主憂

長垣四星在少微之西方南北相列主界域及胡夷其占火守則胡人入中國水入亦然金入則九卿謀反舊當黃道唐志測在黃道北五度

太微垣說

太微天庭爲衡主平其星爲執法上次將相之職其間有東西左右端門之稱擁蔽帝座而刺舉者爲內屏輔弼天子之政治者爲九卿五諸侯內侍天子而不之國五帝座各隨方色而施其行太子帝儲幸臣侍太子而爲親愛從官侍側謁者贊賓客以辨域情即位爲守衛之司亦元士尚書之象三公卽內朝之座爲燮理輔弼之臣宿衛之武官爲郎將侍衛之武士爲虎賁宿衛虎賁設強毅太微之北號常陳

太微垣歌

上元天庭太微宮昭昭列象布蒼穹端門只是門之中左右執法門西東門左皂衣一謁者以次卽是烏三公三黑九卿公背傍五黑諸侯卿後行四個門西主軒屏五帝內座於中正幸臣太子并從

官為列帝後從東定郎將虎賁居左右常陳郎位
 居其後常陳七星不相誤郎位東陳十有五兩面
 宮垣十星布左右執法是其數官外明堂布政宮
 三個靈臺候雲雨少微四星西垣隅長垣雙雙微
 西居北門西外接三台與垣相對死兵災

太微垣考

太微宮垣十星在翼軫之北 帝座五星在垣內
 西籓中 屏四星在五帝座南近右執法 幸臣
 一星在帝座東北 太子一星在幸臣西帝座北

從官一星在太子西北 謁者一星在左執法
 之東北 三公三星在謁者東北 九卿三星在

三公北 郎將一星在郎位東北 虎賁一星在
 垣外下台南土相之西北 常陳七星在郎位北

郎位十五星在帝座東北 明堂三星在垣外
 西南陬 靈臺三星在西垣外 少微四星在太

微西垣外南北列 長垣四星在少微南西北列
 三台六星兩兩而居

太微垣

別本參考

太微宮垣十星在翼軫之北一曰天庭一曰保舍
五帝之座十二諸侯之府其外藩九卿也軒轅爲
權太微爲衡治法平詞命德稽疑列宿之所受封
諸侯之所考節也左執法廷尉之象右執法御史
大夫之象東西藩有芒角搖動者諸侯謀天子也
五帝座五星在太微宮中中央一星爲黃帝座東
一星青帝座爲威靈仰南一星赤帝座爲赤熛怒
西一星白帝座爲白招矩北一星黑帝座爲叶光
紀卽月令木火金水并中央土五是也俱天子之
位明正則天子篤厚暗凶移徙則失位
謁者一星在宮中左執法之東北主贊賓客辯疑
惑不見外國不服○三公三星在謁者之東北三
公朝會之所居也主輔國謀事與紫微夾斗之三
公同○九卿三星在三公之北主治萬事與天紀
同○五諸侯五星在九卿之西內侍天子之國主
辟雍之禮卽天子畿內之諸侯也又主刺奸天經
曰獻淵謀於諸侯是也不見則諸侯凶○內屏四
星在太微之門中五帝座之南右執法之北主執

法舉刺擁蔽帝廷也明潤則君臣有禮○幸臣一星在帝座東北天子之侍臣也明盛則嬖幸用事微小吉○太子一星在帝座北幸臣西天子之儲貳也明潤則太子有德金火守有篡逆事○從官一星在太子西北太子侍從之官也守常則無咎不見則帝不安以上皆太微垣內之星

郎將一星在郎位之東北天子之武衛今左右郎中將是也主閱武備大明芒角動則將專恣○郎官十五星在太微帝座之東北一曰依烏郎府周官之元士漢官之光祿中散諫議郎是其職也又云二十四星今之尚書郎也大小均齊光潤則吉又主衛之臣明大則有劫主之禍○常陳七星其狀如畢在郎位之北天子之宿衛也主備強禦星欲明靜微則兵弱○虎賁一星在西藩之外上相之西下台之南旄頭之騎官也主宿衛侍從與東騎同不宜變色○明堂三星在垣外之西南天子布政之宮也主宗祀先王朝覲萬國明吉政教大行暗則天子失政○靈臺三星在明堂西主觀雲

物察機祥候災變天經曰候鬼神於靈臺是也與
司怪同星不欲見又云明正則風雨順○少微四星在虎賁西列士大夫之位也一名處士主供任
使弼教化亦主衛掖門南第一星爲處士第二星
爲議士第三星爲博士第四星爲大夫星明大而
黃賢才舉○長垣四星在少微西南主邊界城邑
及胡夷疆域不宜變動○三台六星兩兩而居一
曰天柱一曰天階一曰火階上台起文昌中台對
軒轅下台抵太微上台曰太尉司命爲孟中台曰
司徒司中爲仲下台曰司空司徒爲季黃帝占曰
泰階天之三階也上階上星爲天子下星爲女主
中階上星爲諸侯三公下星爲卿大夫下階上星
爲士下星爲庶民主和陰陽理萬物又曰上爲司
命主壽命中台爲司中主宗室下台爲司祿主兵
火明正吉金火彗孛犯兵起三階平天下泰平六
符者六星之符驗也

以上皆太微垣外之星

占太微垣

太微在翼軫北天子正宮也將相三公九卿之府

十二諸侯之司荊州占曰軌道太吉月五星從西門入出東門左右掖門入出端門者太平南藩二星東星曰左執法廷尉之象西星曰右執法御史大夫之象執法所以舉刺凶器也兩星之間南端門也左執法東左掖門右執法西右掖門東藩四星南第一星曰上相第二星曰次相之北中華門第二星曰次將次將之北太陽門第四星曰上將所謂四輔也西藩四星南第一星曰上將上將之北西華門也第二星曰次將次將之北中華門第三星曰次相次相北太陰門第四星曰上相亦為四輔

黃帝座一在太微宮中天子之正位合天地日月星辰之明其星常明合天地之化微星求賢士自輔四帝擁黃帝各順其方東青帝南赤帝西白帝北黑帝五星明有光天子得天地臣民之心不明失帝 屏星在五帝座南近執法舉善惡臣敬奉於上星光明潤色 太子在帝座北有德卽星光潤不見星亡太子不利有憂 從官幸臣各一侍

從太子之官 常陳在帝座之北太子之宿衛武
賁之常士於座後搖動主太子出自明盛武周
郎將在左卽爲外禦亦主武備關具郎將之官
郎位在垣內帝東北守衛司又曰烏郎之府周官
之元士漢之光祿中散臺省郎星不具郎官多憂
五諸侯在卿西四侍天子百辟之禮不明五諸侯
有黜者三公在執法東佐帝內三公九卿內侍內
省之職不明內省大臣死 謁者在宮內左執法
東北贊省客辨疑惑明如常四夷來貢不明亡失
四夷不來 虎賁侍衛之官

太微垣諸星去極度數考

按太微垣在翼軫之上常以正月昏候於卯二月
昏在辰三月昏在巳四月昏在午五月昏在未六
月昏在申七月昏在酉 八月旦候於卯九月旦
在辰十月旦在巳十一月旦在午十二月旦在未
正月旦在申二月旦在酉
太微垣十星在翼軫之北天子之宮庭淳風云翼
軫角亢列於巽丙萬物出乎震齊乎巽物齊則

不可不治故巽以行權以成天下之政天象乃在
太微垣於東南巽丙之地以象天子之庭向明而
治天子之庭政教出焉法度在焉政有不經由太
微垣過以授事於天子之庭也日月爲君后之象
雖尊必從庭正禮法爲天下之政
五帝之座○中央曰黃帝含樞紐之神也東方曰
蒼帝靈威仰之神也南方曰赤帝赤熛怒之神也
西方曰白帝白招矩之神也北方曰黑帝叶光紀
之神也

十二諸侯之府○卽女宿十二諸國越周代晉韓
魏楚燕齊趙鄭

太微天庭衡主前漢律曆志云權與物均而生衡
衡運生規規園生矩矩方生繩繩直生準準正則
平衡而均權矣是謂五則準繩連體體衡合德百
工由是以定法式又爲天庭主理法平詞監升授
德爲列宿受符諸神考節諸神稽疑言分治刑獄
平允詞訟臨事可升畀授有德爲周天星座付授
符命枝貫節制尤當寬舒其情考稽其惑如熒惑

管窺輯要 卷之九
每歲授事太微垣與南斗十月至斗行天之罰是也禮記月令云孟春天子命相布德和令行慶施惠下及兆民慶賜遂行毋有不當卽此意

其外藩九卿漢之九卿一掌禮樂後更名太常二光祿勳掌郎衛後更名郎中令三衛尉掌宮中徼巡之事四太僕掌輿馬五廷尉掌平獄刑亦名大理六鴻臚亦名火行入掌朝貢禮七宗正掌天子親屬八大司農掌穀貨九少府掌山海池澤之稅唐九卿太常寺宗正寺光祿寺衛尉寺太僕寺大理寺鴻臚寺司農寺大府寺寺者嗣也言治事者相嗣續於其內

南藩中二星曰端門端正也

東西兩藩各五星東曰左執法去極八十六度入軫二度廷尉之象今刑部也部有尚書侍郎郎中員外主事又古廷尉爲大理寺官

西曰右執法去極八十四度入翼一十一度半御史大夫之象今都察院也院有左右都御史左右副都御史左右御史大夫三御史中丞四侍御史

五治書侍御史六殿中侍御史七監察御史執法所以舉刺凶姦者也左執法之東曰左掖門右執法之西曰右掖門左掖即今午門外左右掖門

東藩近左執法曰上相去極八十七度入軫八度即紫微垣上宰也又古者太師太傅太保為三公即上相之位 其北東太陽門其門在左故曰東太陽門即今東上南門

次曰次相去極八十一度半入軫一十一度即紫微垣少宰也又古者少師少傅少保為三孤即次相之位 其北中東華宋門即今東安門

次曰次將去極七十四度半入軫一十二度即紫微垣少衛 其北東太陽門其門在東太陽門北故曰東太陽門即今東上北門

次曰上將去極六十八度入軫一十四度即紫微垣上衛所謂四輔也即上相次將也

西藩近右執法曰上將去極八十度入翼四度即紫微垣上衛也 其北西太陽門其門在右故曰

西太陽門卽今西上南門

次曰次將去極七十五度入翼五度卽紫微垣少
衛也 其北中華西門卽今西安門

次曰次相去極七十度半入翼三度卽紫微垣少
宰也 其北西太陽門其門在西太陽門北故曰

西太陽門也卽今西上北門

次曰上相去極六十五度半入翼二度卽紫微垣
上宰也亦四輔也卽上將次將次相上相也

占曰太微之變東西籓有芒角動搖則諸侯有謀

執法若移則刑罰尤急月與五星入太微軌道干

犯則天子誅有罪各以官占之月行太微中貴者

失勢亦爲喪四夷兵起或有奸人來聽伺木星入

則天下大喜有赦火星入而留逆有逆賊入朝宮

中不安有火災歲旱土星入則有德令久留則君

有憂女后執政金星入則大臣將相有誅戮之禍

執法御史有黜若庚子日順入天子所使無妨水

星入則有內亂后宮災天下大水客星入則有奇

令亦主兵罰有罪彗孛干犯則兵喪並起貴人死

流星出入則大臣有外事出入天庭乃天子使奔星入剗地亂氣入色黃天子喜天下安大臣受重賜奔星入奔星出則犯亂

五帝座五星距中大星去極七十一度半入翼一十度在內屏北宋中興天文志云太微垣有五帝座而五帝內座又列於紫微垣何也曰五帝常居在太微而入覲乎紫微故有內座也然而五帝何帝也此所謂靈威仰赤熒怒含樞紐白招矩叶光紀之神有天皇矣又有五帝何也五帝在天主五行

在地主五岳分方主事以輔天皇者昔周公郊

祀后稷以配天斯北極紫微中宮天皇大帝也而宗祀文王於明堂以配上帝則太微上宮五帝也此月令明堂所以分五宮而祀五帝也

占曰天子動止上合天心從容中道則帝座明而光潤不明人主當求賢以自輔張衡云太微五帝座星小弱青黑天子亡國動搖移徙天子失位月與五星彗孛干犯則爲大人憂若五星入黃道座而色白者有赦客星犯臣有謀至座而還則謀不

成反受其殃氣入色黃出太子而入帝座不出六
十日太子入天子位色蒼白有憂喪赤氣如劍天
子有兵驚黃氣傍帝座天子有男喜黑氣如交蛇
不散有白衣會邪臣不正之氣

幸臣一黑星去極六十四度半入翼十五度在帝
座東北天子親愛臣常侍太子太子帝儲亦曰東
宮君之貳

占曰幸臣暗微吉芒動則弄權彗孛守犯則有奸
謀

太子一黑星去極六十六度半入翼一十一度半
在幸臣西帝儲也 解見上

占曰太子星明潤則仁賢不明則昏庸彗孛干犯
則大有凶惡月犯則國母不親內讒謀害或后宮
有謀金火守犯有棄廢或篡逆之事包藏禍心
從官一黑星去極六十四度半入翼八度半在太
子西北侍臣也

占曰從官不見則帝儲不安如常吉

謁者一黑星去極八十三度入軫一度在執法東

主贊賓客辨疑惑周禮春官內使掌王之八柄掌書王命蓋其任也漢有中書謁者令丞屬少府事是文帝以張釋之爲謁者

占曰謁者居常吉則四夷來貢不見則外夷叛移近內屏則當防奸人入朝彗孛守犯則謁者通夷奸叛兵起金火守謁者災

三公三黑星距東去極八十四度半入軫六度在謁者東北而以爲朝會之所又爲輔弼之臣亦曰

三公內座

解見前

占曰三公居常吉明大芒角逼主彗孛守王公奸逆不臣客守有陰謀金火犯三公有黜或有下獄之禍

九卿三黑星距西去極七十五度入軫七度在三公北輔天子治萬事

解見前

占曰九卿如常則吉不見則九卿失職彗孛守犯大臣逆謀金火守大臣下獄

五諸侯五黑星距西去極七十度入軫一度在九卿西爲內侍天子之國以輔佐如周公封魯不就

魯國留以輔成王○又曰主刺姦周禮大司寇司刺掌三刺以贊司寇聽獄訟一刺曰訊羣臣再刺曰訊羣吏三刺曰訊萬民○又曰主辟雍禮禮王制云天子之學曰辟雍言水環之壁也蓋天子有五學辟雍居中其南爲成均其北爲上庠其東爲東序其西爲瞽宗

占曰五諸侯星明則吉禮樂盛亦無僭越之輩暗則諸侯黜若枯燥則各於其處受災夫至誅戮小至流亡動搖則搃命以干王若僭同天子之禮樂肆行無忌彗孛守則南逆謀

郎位十五星距西南去極六十度入軫初度在帝座東北亦曰依烏郎位一曰依烏府也王守衛之官又主省署郎位漢書作哀烏則哀烏尉然言星之貌狀也正義云周之元士漢之光祿勳中散騎諫議議郎三署郎是其職也愚常考之周有八十一元士漢光祿勳九卿之一中散騎郎散騎常侍規諫過失得從顧問也諫議諫者以言正君也古者有三諫一大諫諫議也二甲諫補闕也三小諫

拾遺也議郎漢中郎將分長三署郎有議郎三署
郎中署部也蓋郎中令其屬官有三署五官中郎
將左中郎將右中郎將明帝謂曰郎官上應列宿
出宰百里苟非其人則民受其殃又楊東疏云太
微積星爲名郎位入奉宿位出宰百里

占曰郎位星均明光潤居常吉怒色芒角大臣爲
亂彗孛干犯臣失職元士凶大臣爲亂謀叛

陳七星距東去極五十一度半入軫初度在郎位
北如畢伏天子宿衛虎賁之士所以備強禦難書

周官云虎賁民掌領虎士八百人選有勇力爲之
謂之虎賁士又顧命云虎賁百人又周禮夏官虎
賁氏掌先後王而趨以卒伍軍旅左傳信公二十
二年邾人以須句故出師卑邾不設備而禦之臧
文仲曰國無十不可易也無備雖衆不可恃也
占曰常陳所以爲武備明大搖動則將專驕恣不
遏芒角將爲亂不見搏有憂兵律失彗孛干犯非
死則戮常陳而天子自將兵金火守虎賁下獄
郎將一星去極四十七度半入軫一十一度在郎

位東北爲武備主宿衛官 如漢之五官中郎將
是

占曰郎將明大搖動將驕恣慧字守犯則大將叛
逆兵起金火守必有不還之使以符節作奸

虎賁一黃星去極六十二度少入翼二度在太微
西藩之外主侍從武士 解見前

占曰虎賁芒動則將驕恣慧字干犯大將叛逆兵
起

明堂三黑星距西南去極九十度入翼四度在太
微垣西南天子布政宮王氏曰夏世室商重屋周
明堂者所以明諸侯之尊卑制禮作樂須度量而
天下服此古制也三輔皇圖云明堂者大道之堂
所以順四時行月令宗祀先王祭五帝也孝經援
神云明堂布政之宮也在國之陽上圜象天下方
象地八憲法八風四闔法四時九室法九州十二
重法卞二月三十六戶法三十六兩七十二牖法
七十二候是故孔子以爲宗祀之所孟子以爲王
政之堂

占曰明堂乃朝覲萬國之堂星明則王道行不見則明堂毀不行王政彗孛守犯則天子無道國易政火守火災土木守明堂毀而復興漱清考齊宣問孟子曰人皆謂我毀明堂毀諸已乎孟子對曰夫明堂者王者之堂也王欲行王政則勿毀之矣又云是明堂興自文王最盛之事後世之主興而廢廢而興未見有久於明堂者皆慕明堂之虛聲而無實政者何也總之明堂之王政皆便民不便於已故也

靈臺三黑星距南去極八十度半入翼初度在明堂西觀臺也主觀雲物察符瑞候災變禮月令云孟春之月天子乃命太史守典奉諸司天日月星辰之行宿離不貸毋失經紀以初爲常其謂是歟左傳僖公五年正月辛亥朔日南至公既視朔遂登觀臺以望而書禮也九分至啟閉註云春分秋分也夏至冬至也啟立春立夏也閉立秋立冬也必書雲物卽今之觀星臺漱清考靈臺官街北京欽天監靈臺卽官七員南京欽天監靈臺卽官二

員皆仰觀天象俯察地形候雲氣而驗天時測機
衡而齊七政見有官名不指而以臺名誤矣差矣
占曰靈臺居常明吉不見則司天失職靈臺有死
者金火守則靈臺凶彗孛干犯則陰陽不和四時
不正王道乖張

少微四星距東大星去極六十五度入張十五度
在大微西南北而爲列士大夫位一名處士

南第一星爲處士○晉陶潛字元亮少懷高尚嘗
著五柳先生傳以自況以親老家貧謂親朋曰聊

欲絃歌以爲三徑之資執事者聞之以爲彭澤令
後解印綬賦歸去來辭朱子於綱目書晉處士陶
潛又唐鄭薰字子傳再知禮部舉引寒俊士類多
歸之旣老號所居爲隱岩蔣松於庭號七松處士
漱清考慮士自古及今不啻二子孟子時有處士
橫議漢時有四皓羽翼太子未必不非處士○或
曰博士兩漢於太常寺國子監皆置博士又曰博
士魏官也魏文帝初置晉因之掌引導乘輿王公
以下應追謚者則博士議定之漱清考我朝設三

博士者國子監一博斯文太常寺一博樂之詩文
欽天監一博士天文亦曰主衛掖門左右掖門
第二星爲議士○唐李泌京兆人幼以才敏著聞
玄宗使布衣交太子常謂之先生後隱居潁陽上
自馬嵬北行遣使召之謁見於靈武上大喜出則
連轡寢則同榻如爲太子時事無大小皆咨之言
無不從至於進退將相亦與之議上欲以泌爲右
相泌固辭曰陛下待以賓客友則貴於宰相矣

第三爲隱士○漢嚴光字子陵少與光武同遊學
及帝卽位光乃隱身不見帝思其賢乃以物色訪
之後齊國上言有一男子披羊裘釣澤中帝乃遣
使聘之三反而後至除諫議大夫不屈歸富春山
漱清考巢由務光皆其類又有二隱如咸榮緒閔
康之者三隱如陶靖節周續之劉遺民號潯陽三
隱者當春秋時長沮桀溺丈人荷簣孔子曰隱者
也易曰履道坦坦幽人之貞又曰肥遯無不利又
曰不事王侯高尚其事是豈獨一光
第四爲大夫○大夫以士大夫有材行無官守者

漱清考此之大夫如孟子在齊仕而不受祿之意
占曰少微星明大黃潤則賢士舉隱逸用天下治
安朝有喜起之休不見則天地閉賢人隱彗孛守
犯有白衣之會聚王者凶客星守隱士大夫有入
朝面君者

長垣四黃星距南去極七十六度入張一十四度
在少微南主邊界城邑亦主胡夷李淳風云主界
域

占曰長垣芒角動搖邊城不安彗孛干犯邊將九
卿謀逆叛主客星出入邊將與胡人交通不良

三台六星在軒轅上兩兩而起居文昌列招搖抵
太微言起自文昌列招搖直抵太微垣一曰天柱
三公之位也主開德宣符言開廣君恩宣明符命
西近文昌二星名上台距北去極三十九度半入
柳二度為司命主壽○周禮大宗伯云上台司命
為太尉

次二星對軒轅曰中台距西北去極四十五度入
張二度為司中主宗室○天子宗室之臣周禮云

中台司中爲司徒

東三星抵太微曰下台距西北去極五十二度入翼二度爲司祿主兵所以昭德塞違○周禮大宗伯云下台司祿爲司空左傳桓公二年以宋賂郟之大鼎納於太廟其臣臧哀伯諫曰人君者將昭德塞違以臨照百官註云照明善政閉塞惡邪臣下之悖惡也又曰三台爲天階太乙攝之以上下太乙神明躡履也一曰泰階上星爲天子下星爲女主中階上星爲諸侯三公下星爲卿大夫下階上星爲士下星爲庶人所以和陰陽而理萬物也○三台一曰三能又漢東方朔曰願陳奉階六符孟康云泰階三台也台星凡六星六符六星之符驗

占曰三台平明則陰陽和風雨時五穀登祥瑞應三台不平則寒暑失節雨暘不時百神不享旱澇迭至災異並生天下不寧三台色齊則君臣和不齊則君臣乖尊卑無序三台不見則君臣失職朝綱解紐三台疏折則君臣離心離德月犯三台公

族女主凶彗孛干犯相臣憂兵喪並起客星入三
台則奸人伺察君相黃氣入三台相將妃后有喜
白黑主死喪又曰三台相抵則諸侯爲亂上台不
見春不得畊中台不見夏不得耘下台不見秋不
得收上變從上中變從中下變從下變者反叛作
逆之意○三台諸家係以太微太史公獨列之以
中宮北斗文昌之次以爲天子三階不當置之外
垣

月五星入太微就道從西入太微曰順從東入太

微曰逆

太微垣列座

干犯附占

出帝座北其禍大出其南禍小皆爲下謀上

月犯四帝座天下有喪

月暈帝座貴人死有赦一曰天子自將兵五

穀大貴

五星中犯乘守黃帝座天下有逆亂臣謀主石氏
曰改政易主天下亂存亡半有非其主立天下不
安

五星中犯乘守四帝座臣逼君一曰有謀主者去之一尺以內事成遠則有謀不成入日占國五星入帝座其色白皆爲有赦行入太微庭皆爲諸侯將相謀逆至帝座者成至而復出有謀不成各以其入日占

木星觸黃帝座人主遇賊

火星犯黃帝座天子宮破國滅一曰火入帝座天子庭有逆臣若觸之天下無主荊州占曰火行五帝座者有赦若出黃帝座北天子辱諸侯徙若中黃帝座則天子死天下亡近之而不犯則臣謀亂不成

鎮星犯帝座女主作威福

金星入帝座兵在宮中天子憂賊

辰星抵帝座國有大土工

客星入太微犯黃帝座天子憂臣謀主至帝座而還謀不成反受其殃

客星守帝座十日以上謀逆者成不出一年

客星抵帝座天子有喪犯帝座臣謀反

赤星銳如鉤抵帝座天子兵大驚

黑星抵帝座天子惡之

黃星抵帝座有進美女者一曰火驚

流星犯黃帝座天子易東西犯者皆死亡

流星抵黃帝座天下亂臣弑主國移政不出三年

流星犯四帝座輔臣有誅執政者憂貴人多死不

出三年

彗孛干犯五帝座王者滅亡出帝座兵起有亡國

天下亂

彗刺帝座宮中亂兵起有大喪王者亡

蒼白氣抵帝座天子有喪事抵帝座旁有反臣黑

氣抵五帝座左右諸侯有死者留而不去大人憂

黃白氣正圓如杯椀抵帝座左右諸侯有喜

蒼白氣出五帝座徑出南門者不出九十日人主

失其宮天下不安赤氣出五帝座同占一曰兵起

有立王

赤氣出五帝座下入幸臣中不出六十日近臣有

欲謀君者不成天下大亂赤氣若蒼白氣出幸臣

冲帝座近臣謀逆事成赤氣入太微中直指帝座
内外兵起氣自外入指帝座防外兵入黑氣抵五
帝座左右諸侯有死者

黑氣抵五帝座留止不去大人憂

赤黃氣出五帝座天子有使於諸侯

黃氣出太子座上入五帝座不出六十日太子卽

位黃白氣正圓如杯椀抵帝座左右諸臣有喜

赤氣如劍指帝座天子有兵驚

赤氣狀如箒抵帝座天子有婦女兵驚

黃白氣潤澤狀如刀劍抵帝座旁天子有男喜

赤黑氣如龍如蛟蛇入帝座有白衣之會

謁者

謁者一星在太微宮中左執法之東北主贊賓客
辨疑惑其星明則四夷來賓不見則外國不服謁
者移近内屏宜防奸客五星客星彗星守犯謁者
有赦

三公

三公三星在太微宮中謁者東北三公之内座朝

會所居也以輔德謀事其占與紫微宮夾斗三公同

月五星客星流星彗孛犯乘三公有憂不則將相大臣有誅死者

九卿

九卿三星太微宮中三公之北九卿朝會之內座也主治萬事星亡則九卿非人法政大壞
月五星犯九卿九卿有誅死者

流星犯九卿有反者王者有大憂一曰病疾

彗孛出九卿有反者犯九卿受誅

五諸侯

五諸侯五星在太微宮中九卿之西天子畿內之諸侯也主刺奸星不見則諸侯黜一曰辟雍之禮得則諸侯星明

客星彗孛犯五諸侯或守之皆為諸侯有誅死者不則有貶黜流星犯之宰相被辱

經星內屏

內屏四星在太微門中五帝座南近右執法所以

擁蔽帝庭也主執法刺舉其星明潤則君臣有禮
不明則法律謬

月犯乘內屏君臣失禮輔臣有誅黜者
五星中犯乘守內屏君臣失禮下謀上一曰大臣
有誅戮者

太白入太微至內屏有兵在宮中

客星犯守屏星輔臣有誅黜者一曰君臣失禮

赤星出屏星有僭位者

流星犯內屏王者大憂一曰尚書憂有死者

彗孛出內屏守衛之臣有以罪誅者一曰執法者
當之

幸臣

幸臣一星在帝座東北太子之侍臣也其星不明
則吉明盛則嬖幸用事

青赤氣入幸臣中近臣有謀不明則不成明則爲
亂

太子

太子一星在幸臣西帝座天子之儲貳也其星明

潤則儲君有德暗黑則凶

月五星犯太子皆為太子有憂

金火守犯太子不死則廢黜或有篡奪

客星彗孛犯太子不死則廢黜彗出太子座者篡

逆內亂

從官

從官一星在太子西北侍從之臣也星亡則君不

安守常則無咎

郎將

郎將一星在郎位東北武衛之官也主閱武備星

明大則將專恣明而角動則將為亂變色移徙不

見則將有憂

五星犯守郎將將有誅一曰大臣為亂王者戒慎

左右荊州占曰有以符節為奸者又曰必有不還

之使也

客星入郎將若守犯之大臣為亂君令不行

客星出郎將色青黑郎將不死則黜色黃有遷色

白受賜

流星入抵郎將或犯之郎將誅一曰臣有亂王者
慎左右

彗孛出郎將大將反兵起犯之將軍不死則誅

虎賁

虎賁一星在太微西藩之外上相之西下台之南
旄頭之騎官也主宿衛侍從變色動搖則兵車大
動

彗孛出虎賁侍衛之士爲亂

常陳

常陳七星如畢狀在郎位北天子之宿衛也主備
強衛示難其星明則武備修暗則兵弱動搖則天
子自出移徙帝座則近臣誅

五星犯守常陳守衛有謀兵起宮中天子自出行
誅

客星出常陳守衛者有謀兵起左右王者憂俱不
出其年客星犯常陳天子行誅

流星入常陳宿衛者有罪誅人主憂期一年

彗孛出常陳天子殺守衛之臣一曰防守者有死

郎位

郎位十有五星依烏然在太微帝座東北周宮之元士漢官之光祿中散諫議郎三署郎中是其職也張衡曰今之尚書郎也其星大小均齊光潤有常則吉明盛角動則臣有劫主者星不見則侍臣誅微暗黑小則郎官失職

月犯郎位郎官受誅

五星犯郎位左右宿衛者謀爲亂天子宜預防之人星守郎位國有兵喪王者忌之

客星犯郎位大臣失勢客星入郎位大臣爲亂石氏曰多死者

赤星入郎位兵起黑星入郎位郎官多犯罪者

蒼白星入郎位郎官爲亂出郎位郎官出將一曰守衛臣有謀人主憂將相有誅者外夷反叛郎官多死者守郎位元士憂

流星犯郎位郎官有貶出者

流星出郎位郎官出使色亦爲將兵出

流星入抵郎位或犯之守衛之臣有誅一曰左右

爲亂有戮死者遠不出二年

彗孛出郎位郎官謀叛犯郎位郎官憂

枉矢出郎位郎官反

蒼白氣入郎位中兵起一曰中郎有內亂者出郎

位禍除

赤氣入郎位中兵起出郎位多有兵遠出行

黃白氣潤澤入郎位中受賜

黑氣入郎位中郎官多以罪死者

明堂

明堂三星在太微垣外西南陬天子布政之宮也

三宗祀先王朝覲萬國其星明則王道行暗小則

反是五星犯守明堂天子易其宮

靈臺

靈臺三星在明堂西主觀雲物察機祥候災變星

不見則司天之官失其序陰陽不和

五星犯靈臺水旱不時一曰曆官有憂

青黑氣入靈臺有大風雨不出七日黃氣入靈臺

太史喜赤白氣入靈臺太史憂

少微

少微四星在太微西南北列士大夫之位也一曰處士水官也主賓賢才弼教化一曰主衛掖門南第一星爲處士第二星爲議士第三星爲博士第四星爲大夫其星明大而黃則賢士舉天下安微暗失色則天地閉賢人隱黃帝占曰少微主藝能道術之士星明而行列正則王者任賢良舉隱逸天下治安微小不明則賢良不出道術潛藏天下不安一曰少微近太微若一星獨前入太微必有

謀賊天子者

月犯少微處士有憂一曰女主憂宰相易使官黜一曰囚犯第一星處士憂犯第二星議士憂犯第三星博士憂犯第四星大夫憂

歲星入少微君當求賢以自輔不則失威奪勢木星入守少微名士憂王者信用小人忠臣被害有死者黃帝占曰宰相易女主憂五官作亂熒惑鎮星太白守犯中入少微其占與歲星同火星犯少微名士有讓善者

金星犯少微大臣有戮死者

客星犯少微有曰衣聚者王者凶道術不用智者

逃亡期三年守少微處士憂入少微奸臣聚出少

微道術之士用一曰有方技之士以術進媚於大

子者

守犯少微宰相易女主憂

流星出少微賢士出視其所之

流星入抵少微賢良集道術用能人多有來者

流星犯少微家人不明賤人用事

彗孛犯少微或入少微有白衣聚王者凶道術不

用賢士逃亡又曰家人不明賊人其昌出少微多

能臣有戮者若功臣有罪一曰法令臣有誅者彗

出少微士大夫起

蒼白氣入少微賢士憂大臣黜

赤氣入少微宰臣謀叛

長垣

長垣四星在少微南西北列主邊界城邑及城夷

狄疆域其星明有變動搖則邊城不安

歲星入長垣強臣凌主天子以兵自守叛臣伏誅
熒惑守犯長垣邊兵入出則邊兵出若守之則邊
兵大入

太白入長垣九卿謀反邊將叛犯之狄兵犯邊守
之邊兵大起

辰星犯長垣狄兵入邊兵城憂

流星入長垣大臣反兵起宮中天下亂有亡國人
主憂一曰狄不安狄兵入塞

蒼白氣入長垣狄兵起赤氣入長垣狄兵入亦為

火赤氣出長垣邊兵起

三台

三台六星兩兩而居一曰三能一曰三衡一曰三

奇一曰天柱一曰天階一曰泰階三公之位也諸

侯大夫之象也上台起文昌中台對軒轅下台抵

太微上台曰太尉司命為孟中台曰司徒司中為

仲下台曰司空司祿為季黃帝占曰天階天之三

階也上台上星為天子下星為女主中階上星為

諸侯三公下星為卿大夫下階上星為士下星為

庶民主和陰陽理萬物又曰三台大間中相去十
有六度爲平過爲大不及爲隕小間中相去半度
爲平過爲奢不及爲迫又曰三台爲天階大一躡
之以上下春秋元命包曰三能主開德宣符故六
星又爲六符西近文昌宮二星曰上台爲司命主
壽中二星曰中台爲司中主宗室東二星曰下台
爲司祿主兵一曰上台上星主兗豫下星主荆揚
中台上星主梁雍下星主冀州中台正星主青州
下星主徐州星非其故以貞其邦巫咸曰三能主
官也主爵祿三階平則陰陽和風雨時五穀豐祥
瑞應三階不平則寒暑失節雨暘不時百神不享
災異並生天下不寧三台色齊明則君臣和不齊
則君臣乖三台色青黑天下多憂甘氏曰三台色
黃潤澤天下謀德色赤謀兵色黑有憂色白有喪
色青疾病三台不宜天子失謀三台橫國主亡三
台移三公非其人三台相抵諸候爲亂三台不見
有亡國上台不具春不得耕中台不具夏不得耘
下台不具秋不得收三台動搖天下有謀朝廷失

策三台疏折三公憂上台疏變從上家起中台疏變從中家起下台疏變從下家起所謂變者謀反作逆也三台不齊大小失常則三公不得其人人主有憂三台一星不見則天下危二星不見則天下亂三星不見則人紀滅絕天下無主

月入三台君有大憂敗在臣下黃帝占曰公族弑君大臣爲主

月暈三台三公下獄一曰女主凶

歲星犯上台近臣有罪若有謀一曰近臣有逃走者以五色占其吉凶郝萌曰改年易紀太尉死天子惡之犯中台司徒病一曰奸臣有謀犯下台近臣有罪出走色黑則死黃無事

災惑入犯上台近臣有以罪誅者一曰近臣有逃去者以五色占之火犯守上台宮禁門焚太尉死天子惡之犯守中台司徒公族皇后惡之一曰奸臣有謀若有誅之者中公當之犯守下台民多疾病死喪有兵且饑

火守三台三十日天下大亂兵起宮中大臣戮死

若守兩台之間尤甚一曰火守三台地動兵亂三年乃止

火犯三台天下奮擊諸侯相爭又曰三公專恣火觸三能

鎮星犯三台近臣有坐罪誅者有犯罪逃者色黑死黃吉

太白犯守三台近臣有誅者犯守上台太尉將兵在宮中大戰流血貴人死者衆犯守中台司徒反犯守下台司空反荊州占曰天下驅掠兵聚一隅

一曰地動兵起臣弑主

辰星犯三台天下兵大起臣謀主

客星入三台色黃白貴人有賜爵者色蒼黑貴人有奪爵者客星入三台若守之大臣多戮者貴人多病死者

客星出三台大臣或黜或死貴人多死

客星出三台若守之天子殺大臣貴人有死者

客星舍三台天子左右有不正之臣

客星守三台有兵喪一曰水災

容星入司命近臣有坐罪者色黃白自解色黑死
嬰兒多死色蒼民多死喪色黃白婦人多傷

客星入司祿大臣爭榮色黃白潤澤近臣賜爵色
青有抵罪而走者色黑則死

流星入三台天下有兵大將憂

流星入上台司命大臣有坐罪死者出之近臣有
黜者

流星入中台司中有奸臣來近主者出之奸臣出

流星入下台司祿大臣有受爵封者出之則臣有
罪出走色黑者死皆不出二年

流星出三台大將出師流星入三台天下動兵聚
禍

流星抵上台天子憂抵中台將相憂抵下台民多
憂

彗孛出三台有陰謀宮中火起一曰臣害君禍大
起

彗孛出上台兵起三公大臣有憂出中台奸臣有
謀兵大起貴人黜出下台近臣有憂死

彗孛出三台兩間相反出其中太尉反出其東大
司馬反

黃白氣潤澤入三台民安君喜將相喜

赤氣入三台多敗傷臣有謀君臣相驚

蒼白氣入三台民多死喪出則禍除

青黑氣入三台天子三公俱憂

黑氣入三台三公憂將相死

蓬雲色黃白不過三尺見三台之上布衣有暴貴
者

三台珥主欺吏人臣變姓以爲忠一曰三台珥臣
謀逆

管窺輯要卷之二十

六安黃 鼎玉耳父纂定

男九命簡臣

侄九錫公位

九疇倫叙

九如眉介

侄孫珮琢成

珂先鳴

桐城方兆及子論全閱

一星曰河中市中星衆潤澤則歲實若虛則耗熒
惑守之戮不忠之臣若守之而芒角戮者臣篡逆
彗星出主徙市易都客星入兵大起主有貴喪張
衡云天市明則市利商人無利暗則凶
市樓六星在市中臨箕星之上主闐闐明吉暗凶
隋志云市樓者市府也一曰司市所蒞之次也主
市價律度其陽爲金錢其陰爲珠玉若變見各以
其所主占之

帝座一星在天市中乃帝之位天庭也光潤則天
子威令行微小凶大人當之或曰暗則大臣不正
張衡云帝座者帝王之座天子親治其畿內篤近
舉遠之象凡帝座有五一在紫微垣一在太微垣
一在天市垣一在大角一在心不在傾側宋靖康
丁未閣門宣贊舍人吳革曰天文帝座甚傾車駕
若出必墮虜計

車肆二星在南門之內貨易車之處主車駕占暗
則國車盡行不見則國兵盡出隋志云主衆賈之
區王應電云閣道下車府天子五輅所藏畢上五

車兵車所藏夫兵凶器也欲求萬全卒不如騎騎
不如車故聖人爲車制與經界相表裏實制寇敵
限戎馬之精意也仰觀天象所麗特詳欲禦外侮
可不修舉其法哉兩垣及市樓車肆二十四座爲
外官餘並中官

侯一星在帝座東北畿內諸侯謂諸近臣采地視
侯者也細微則國安明大則輔臣強四夷張百姓
惶惶侯亡則主失位移則主不安居常則吉一作
侯主伺陰陽也宋中興天文志云帝座東北一星
爲后舊侯作侯然則后者乃元后之后非后妣之
后也

列肆二星在斛西北乃肆長所以陳肆辨物而平
市也主寶王之貨占移徙則列肆不安火守入則
兵火起

屠肆二星在帛度東北主烹宰故專其肆明天則
肆多宰殺

帛度二星在宗星東北主度明則尺量平商不欺
暗則反是

斗五星在宦者西南所以平量而一淳制也占覆則歲熟仰則大饑天下料量不平明暗亦然占與帛度同

斛四星在市樓北亦曰天斛主平量也與斗占同宗正二星在帝座東南所以敘玉牒正宗法乃宗大夫也彗守及失色則宗正有變客星守或動則天子親屬有變或更號令又曰宗正明則宗室有秩暗則國家貴戚凶

宗人四星在宗正東主錄親疎享祀天子之親同姓皆食采於王畿故宗人宗正宗星皆列位焉靜而明正則族人有序動則宗人有變

宗星在宗人北侯星之象宗室之象客星守之宗人不和

七公在招搖東橫列貫索之口天之相也鄉老卿大夫之類佐天子以治王畿者也張衡云主執法別善惡之官也齊正則國法平暗及乖戾則獄多冤枉或云星入河則米貴若火犯則兵起
宦者四星在帝座西南王之正內五人也微則國

安明大則奄人強失次則宦者有憂占與勢同
女床三星在天妃北爲后妃之寢也后聽天下之
內治故太微皆天子之事天市多后之事女床麗
焉者天下奢儉貧富之源國母吉凶之候也明則
宮人吉女主安如常則無咎

天紀九星在貫索東市之法也凡建國內宰佐后
立市設其次置其敘正其肆陳其貨賄一其淳制
故斗斛帛度凡司市之法亦內宰所掌而后得以
與聞者也爲九卿又爲九河主萬事之綱紀理冤
獄也明則多訟暗則紀綱廢弛亡則政壞法亂絕
則地震山崩國中大亂

貫索九星七公之前一曰連索一曰連營雪心賊
悞作連珠一曰天牢賤人之牢也主法律禁強暴
市之中姦人聚焉故戮人必於市而天市垣又曰
天旗庭主斬戮之事也牢口向七公之兩星爲門
欲其開也九星皆明天下獄煩暗則獄簡若閉口
及星入牢中有自繫歿者常以子夜候之一星不
見則有小喜二星不見小赦賜祿三星不見人主

德令行且赦四星不見則大赦動則斧鑕用若中空則圉圉虛水犯災火犯米貴若客星出視其大小大則有大赦小則有小赦張衡云貫索開有赦人主憂又國君過市則刑人赦夫人世子命夫命婦過市則罰幕滯蓋帷戒君子不可以近利也

渾天儀人居天外故俯觀之星圖人在天裏故仰觀之二者相類蓋俯仰之異也渾象列宿之度近兩極則狹漸遠漸濶至赤道則極濶也以圓圖視之則近北星頗合天形近南星當漸狹則反濶矣

以橫圖視之則去兩極星皆濶失天形矣今放天形爲覆仰兩圓圖以蓋言之則星度並在蓋外皆以圖心爲極自赤道而北爲北極內官星圖赤道而南爲南極外官星圖兩圖相合全體渾象則星度濶狹之勢占候不差矣

凡圖以夏處南以冬處北理固然矣以秋處東以春處西此蓋從曆家右旋之象說耳豈天象之實哉故月之自西而東於計數雖明於實理則不安矣

管子地員篇
卷之二十一
天市垣說

天市爲國都交易之市車肆爲百貨貿易之肆帝座天庭也神農之所居宦者近臣也君側之所侍市樓乃市府制令之司屠肆主屠宰庖饌之事宗正宗族之官也以司宗室侯星輔弼之臣也以主伺候宗星乃遠近之宗枝宗人錄親陳之享祀主度量買賣者爲帛度貨金玉珠璣者爲列肆斛主度量分銖斗爲平量之事

天市垣歌

下元一宿名天市兩面垣牆二十二當門六個是市樓門右兩星是車肆兩個宗正四宗人宗星一雙亦依次帛度兩星屠肆前侯星邊在帝座邊帝座一星常光明四個微茫宦者星以次兩星名列肆斗斛帝前依其次斗是五星斛是四垣北九個貫索星索口橫着七公成天紀恰似七公形數着分明多兩星紀北三星名女床此座還依織女傍魏趙九河中山繼齊吳越今徐宿當東海與燕及南海宋國分明在左裝河中河間晉鄭周秦蜀巴

今梁楚求韓地右當垣十一天市宮中仔細收

天市垣考

天市垣二十二星在房星東北 車肆二星在南
門之內右傍 市樓六星在天市門內東傍 宗
正二星在帝座東南 宗人四星在宗正東 宗
星二星在侯星東北 帛度二星在宗星東北
屠肆二星在帛度西北 列肆二星在斛星西北
斗五星在宦者西南 斛四星在市樓北斗南
帝座一星在侯星西北 侯一星在帝座東南

宦者四星在帝座西南 貫索九星在七八前
七公七星在招搖東橫貫索上 天紀九星在

貫索東 女床三星在天紀北

三垣附錄

紫微垣三十八座計一百八十四星

太微垣十四座計五十八星

天市垣十四座計一百八十二星

中外官一百八十二座計九百八十一星

以上共二百八十三座計一千四百六十六外微星一

萬一千五百二十

同名八座

南三公星

南司空土星

南太子

南從官

南天田

南積水

南御女

南積尸

天市垣

別本參考

天市垣二十二星在房星東北一曰天府一曰長城天子之市也主權衡聚眾一曰天旗天子之旗幟也主斬戮邊方之事星眾潤則歲實稀則歲虛

火守戮不忠之臣彗出徙市易曰日中為市交易而退天下之民從之神農取諸噬嗑以此

帝座一星在垣中斗星之上侯星之西一曰天庭巫咸曰神農所居帝座有五一在北極一在紫微一在太微一在天市一在大角一在心之中央光

潤則威德行○宦者四星在帝座西北近帝旁所謂天闔也明則宦官專權亡則失寵微明吉○侯星一星在帝座東南主候陰陽伺夷狄又主貨財星欲明靜○斗五星在帝座西南主平量覆則歲

熟仰則人饑明暗與帛度同占○斛四星在斗星
南主司穀明則度量平○列肆二星在斗斛西司
貨財珍寶移徙則市肆不安○屠肆二星在帝座
東帛度北主烹宰明大多宰殺微暗則魚肉貴○
帛度二星在屠肆南主度量交易明均則尺度平
商人不欺○宗正二星在候星南宗大夫也主帝
之宗人又主萬物之品類明大則帝宗強○宗人
四星在宗正東主恩享宗族宗星二星在宗人東
北先人祠享分別親疎皆天子血脉之臣也明正
則宗族有序金火客守族不和○市樓六星在天
市門中宗正之南天子之市府也主司闔闔之市
買律度其星欲忽忽不明○車肆二星在市南門
之內主車駕又主百貨

以上皆天市垣內之星

天紀九星在市垣之北貫索之東九卿之象也又
爲九河一曰天緯主萬事之紀理冤訟齊明則法
正○女床三星在天紀之北女御嬪妾所居之宮
也星欲大小相承明則宮人恣寵搖動則妃嬪弄

管窺野乘 卷之二十一
權暗則后宮幽囚○貫索九星在七公之前一日
連營一曰天圍賤人之牢也主繩姦禁暴其口北
開謂之牢戶中央大星牢監也牢中小星空則獄
空戶開則有赦皆明則天下繫獄○七公七星在
招搖東橫列貫索之口天之轉相主定疑議也石
氏曰七公乃三公廷尉之象主執法紀善惡總七
政齊正則法平差戾則獄寃又云星入河米貴火
犯兵起○梗河三星詳載氐宿內

以上皆天市垣外之星

列宿

蒼龍之角左刑右兵亢爲朝廷疾病氐爲宮室之
嬪房爲布政之宮上下分將相之位心爲天王之
位前后別太庶之名尾主君臣亦爲后宮之府箕
爲嬪御亦主口舌之風南斗爲宰相而授爵祿牽
牛主道路而祚犧牲女作布帛之制虛爲禱祝之
稱危主宗廟營造室爲宮室土功壁爲文章圖府
奎主兵戎溝瀆婁爲天獄苑牧胃爲倉廩五穀昴
主胡王亦爲喪獄畢弋獵而邊兵觜行軍之葆旅

參掌殺伐井當水府鬼主祠祀歿喪柳爲庖厨祭具星爲文繡之羽儀張作珍寶之衣物翼爲娛樂以俳優軫主車騎而風

附宮

鈎鈐有管鑰之稱神宮爲解衣之所離宮卽天子之別宮墳墓卽兆域之處所附耳聽以得失井鉞掌之誅戮二轄並主侯王右異左同而註

占天市垣

七公天子平罪之卿○天紀天之九卿萬事之綱紀○女床爲后宮御女侍從○天市乃天之都都市也星多則市多貿易○帝座在市申明潤則帝令行○宦者乃市井管稅闔宦○候星司候明陰陽○列肆市肆○斛斗量平○宗正卽宗大人○宗人宗星皆帝血脉宗族○屠肆烹宰○帛度買賣貿易○市樓主賈市明賦歛衆○車肆市中車馬人物

中外官占

折威詔獄卒○梗河天梯○周鼎神鼎成王定鼎

於郊世年九百○天田天子畿內躬耕之田○平
道天子入達之道○招搖胡人亦曰矛盾○天門
在角南天子宴遊出入處○平星在角南正紀綱
平獄訟○南門在庫樓南天子外門主守兵禁○
頓頑獄中之吏獄官○陣車革車○亢池渡水迎
送舟船津道○折威主斷獄棄市刑戮○陽門隘
口禦寇○騎官天子宿衛武騎禁兵○騎陣將軍
統攝宗兵之首領○車騎乃車騎陣之將○天乳
所降之甘露○從官乃疾病之醫巫○日太陽之
精昭明令德○積卒掃除不祥○罰主刑法平政
令太平曲而斜賞罰不平○魚在河中知雲雨風
氣狀如雲大而風雨順律呂○正火守主旱在北
大水○天江不欲明明則有大水江河漲溢○傳
說主後宮女巫○龜贊神明定吉凶○糠在箕舌
口主簸揚給犬豕糠粃明卽豐熟不見天下穀貴
暗小爲饑荒○天籥閉門戶之鑰○杵舂杵○狗
主守禦○農丈人主農正官明則豐稔暗小民失
業○織女天女主瓜菓絲帛○天弁人河中辯別

市上珍寶乃市肆之老吏○東西咸房之門戶防
淫佚○漸臺主晷漏律呂之事明則陰陽和律呂
正○河鼓天軍之數中央大星曰大將軍左右小
將軍左傳曰河鼓即名牽牛與織女七月七日相
見天有象以鵲爲橋故每年七月六日天下鵲皆
奔爲橋當此二日天下無鵲至八日鵲來皆頭上
無毛是其驗也此每年七月七日相見○左右旗
爲河鼓旗表○輦道乃太子遊幸之道○天桴知
四時而擊鼓知更漏漉清考桴浮於水而○奚仲送更籌知時刻者

主御車之官○天津橫於河中一星不備津道不
通○瓠瓜瓜菜屬明即瓜瓠熟○羅堰堤塘填官
○離珠女子珍寶珠石○允坎溝渠通泉達道○
敗白人之本庶人之占不見流離散亡○離瑜婦
人服飾○天壘城北夷丁零克奴之類○哭泣乃
哭泣事○人星如人形狀乃姦人巧舌辯事之人
不見則姦人詐佞橫行○司命掌死喪○司祿掌
祿俸○墳墓主兆域以明葬禮流星出入有葬事
○司危掌市中樓閣安危○司非伺候內外察僣

○天鈎入河中式道移徙主地動○車府車輦官
○造父御天子御馬官○杵臼舂軍糧供厨用○
士公吏主土功○虛梁乃丘陵禱祀○蓋屋乃蓋
治屋官○天錢庫藏制錢○附路閣道之別道○
天大將軍統領兵武○卷舌知讒佞明則天下多
口舌○南門主河淮出入○左更右更乃牧養禽
獸官○天溷主糞穢溷廁○外屏乃遮天溷障穢
○土司空乃土功長吏○斧鑕斬剗芻飼牛羊○
天倉倉官也小星衆多倉廩盈○天廩主畜積倉
廩○天陰天子密謀羽獵○天困倉困○天高司
陰陽候氣○積水候水災明則天下水溢○月主
蟾蜍金火守女主災○八魁張羅捕禽官○北落
師門主北方蕃部之主○敗臼左右擁蕃人部落
參佐○天網北落下乃天子遊獵張網○鉄鑕行
謀拒難刀斧○雲雨霹靂雷電並爲陰陽氣擊作
風雨之應○螣蛇如盤虱之狀居河中天蛇也主
北方水虫風雨之司○天廐天馬外廐金火守廐
焚馬廐○離宮兩兩而居乃天子之別宮○大陵

主墓○天船主船○策主僕御邊○王良御車官
○闕道亦名飛閣○天街爲陰陽界月過天街天
下太平○諸王諸王室子孫支庶○咸池魚雀官
○天潢津渡河梁○參旗天弩弓矢○九州殊口
能傳九土風俗言語○天節使臣通遠方宣揚帝
化之符節○天苑養禽獸所○天園菜菓之園○
九旂天子兵旗○軍井乃軍營水泉○玉井天軍
出行水泉○矢主羽箭弧主角弓以備天下盜賊
○厠主溷隱○五車邊將器物○司怪使臣候占
風雨雲氣知天地草木精怪○座旗表君臣尊卑

○五諸侯主刺舉誠不虞官○天罇罇壘酒器○
水位主水移徙近河爲天下大水○積水水官供
酒食○積薪外厠柴薪○水府宮內水官○四瀆
江河淮濟精氣○闕丘天子雙闕懸法象○軍市
軍中市○野鷄主野賊草寇○丈人隱逸之士不
離於家人父子者故有子孫附於左右侍之○天
社祝祀之官○天狗野狗○天記知禽獸齒歲醫
獸者○天相主大臣宰相○天稷民之農具○外

管窺車要 卷之二十一
厨主烹宰○酒旗造酒官○少微乃高隱處士○
燿主烽火備急行火邊地掌四時變火○内平執
法平罪官○長垣邊界城邑○靈臺觀候風雲○
明堂天子布政之宮○青丘蠻夷君長○土司空
南海君亦曰九域地界○軍門天子六軍之門○
東甌東越穿心南蠻三夷之君長○器府司絲竹
官○天廟乃天子祖廟○已上諸坐流星出入其
位所王占之惟青黑爲凶彗孛客星守犯凶變用
占

已上計二百八十四座有名應象常見不隱○
又有一百二十座有明者有暗者○三百二十
座又細星二千五百座爲庶人星常在見而不
隱○又有微星一萬一千五百二十座爲倉靈
蠢動之應附於衆星○八千五百在河中有見
時有隱時也爲蟄虫始振之後其星漸衆至二
三四五六七八月衆見而繁入蟄虫坏戶之候
其星漸少至蟄虫咸俯之候其星並隱蓋隨其
蠢動靈物出則星見藏則星隱

天漢

天漢天下江河淮濟海嶽之氣起東方尾箕之間
謂之漢津分爲兩道其河南南經傳說魚尾天江天
市絡輦道漸臺河北經魚鱉貫箕南斗柄籥天弁
河鼓右旗天津下合南河西行歷匏瓜人星造父
騰蛇王良附路又西南行經天狗天紀大陵天船
卷舌五車南入東井四瀆天稷七星南而沒凡歷
十九宿於天下三分而經二分者也

占例

五星東行以日爲主東行爲順西行爲逆有合聚
經天乘紀侵凌抵觸經貫犯刺環繞鈎已上下喜
怒芒角大小正反搖動掩蔽古占劉開京房崔皓
管輅陳卓上至皇帝重黎下及巫咸甘德石申各
取其要芒者光耀生風芒殺害之象又如錐刺卓
立其上角者頭長芒如有角刺爲興兵誅罰怒者
大黑而小金木赤小土水白小有芒生周匝不依
歷數急慢明而不潤爲刑罰暴兵喜者木青白有
光火大黃赤土黃不動金白大光水赤黃光潤依

次宿分大豐太平

五星大於其常其分興建小於其常其分不熟聚者先至爲福刑禍先至爲禍木至火水爲福德火至木土爲福德土至火金爲福德金至土水爲福德水至金木爲福德

木至金土爲刑禍火至水金爲刑禍土至木火爲刑禍金至火木爲刑禍水至土火爲刑禍福德先去爲災刑禍先去爲福

居者福德之星居其宿分光潤明大天子加福其分大豐刑禍之星居其宿分明潤吉失次大小異常其分殃

經其昏旦出於午晝見則與日爭光女主昌強臣專秦分兵

乘者從下而上抵之春秋日蛇乘龍也主凌辱死亡刑罰兵戈凌者乘上而下曰凌欺殆甲兵強盛觸者兩動直觸鬪則二物往來相觸並兵伐攻戰刺者在旁過光芒相刺亦名相犯爲欺凌甲兵死亡掩者直抵而蔽之不見爲死亡點剝兵甲爭競從

上直下而掩曰吞從下直上而掩曰薄爲侵欺攻戰喪亡

同者二星合而不辯其象兵甲亂歿亡喪環者繞一周繞者不周勻者左去右回右去左回巳者往而復去如巳字並兵起亂國歿亡戴者月在下而星在上立王之象若月在其上而星在其下有喪星饜月者星見月中月饜星者月欲至而星沒吞並之象貫者入其宿中兵出入之象凡乘凌相犯七寸以內爲犯爲欺殆轍行兵甲歿喪黜戮犯者

如刺之狀在旁過而去近光芒相接爲犯七寸以內光芒不相接災輕不成犯淳風按未央曰五寸巳內不論光氣相接爲相犯或相去一尺外光氣相射與犯同占但五星月犯房心南斗太微軒轅大角相去一尺以下三二寸以來光氣不相接刺顯然各異其位謂天垂儆誠彰君之明亦謂爲國任賢世遠天下安兵息民安卽災所主者大臣以小建巳辰占國

若光氣相刺相掩而去災及人君人君當寬刑修

德以禳之淳風按未央論星但各有光氣相連接
又旁過有芒氣刺犯不論尺寸並爲犯兩星不動
無光相刺所主當災於國於君無禍自古君觀五
星而修德火犯心宋景延年蓋發三善之微
五星行至房心南斗太微人君憂惕有犯纔上心
五星不正若人君稟天修德以挽回天心象雖示
而不災亦人君修德之徵應

天市垣諸星去極度數考

按天市垣本位房斗之間常以十月旦在卯十一
月旦在辰十二月旦在巳正月旦在午二月旦在
未三月旦在申四月旦在酉五月昏在卯四月昏
在辰五月昏在巳六月昏在午七月昏在未八月
昏在申九月昏在酉

蓋天市垣二十二星東西兩垣各十一星在房心
東北西離於氏東入於牛爲國市○史記云炎帝
之世其俗朴重端慤不忿爭而財足無制令而民
從威厲而殺不法省不煩始列廛於國中爲市
致天下之民聚天下之貨交易而退各得其所周

禮地官司司徒司市云掌市之治教政行量度禁令
有三市一大市日昃而市二朝市朝時而市三夕
市夕時而市

主權衡

權稱錘也衡橫也所以知輕重漢律曆志云虞書
所爲律度量衡者言齊遠近立民信也又禮記月
令云仲春日夜分則同度量鈞橫右用半甬正權
槩註曰丈尺曰度斗斛曰量稱上曰衡百二十斤
爲石甬斛也槩執以平量器者鈞則平其輕重之
差甬則較其同異之正蓋矯其欺枉

主聚衆

國都日中爲市衆庶貿易貨物至晚則散易師卦
象云君子以容民畜衆畜聚也

一曰天旗庭主斬戮事古者戮人於市以示衆
東垣第一星曰宋去極一百五十度半入尾七度
睢陽卽今歸德府

次南海去極一百零六度入尾十四度今廣東廣
州屬地

次燕去極一百度入箕一度半今幽州薊州屬地
次東海去極九十三度半入箕七度古者淮西為
東海故有海州今嘉興海寧等處皆是

次徐去極八十七度半入斗六度書禹貢徐州之
域東至海南至岱西至濟故曰海岱及淮惟徐州
今徐州是

次吳越去極七十八度入斗九度吳有三吳東吳
蘇州中吳潤州今鎮江西吳湖州又曰吳興吳郡
會稽為三吳越有三越吳越杭州閩越福建南越

廣州

次齊去極七十度入斗五度齊有三齊即墨右齊
臨淄中齊平陸左齊又曰東齊臨淄濟北傳陽膠
東即墨今青刑為齊地

次中山去極六十二度入箕六度半今定州屬地
次九河去極六十二度入箕半度書禹貢云一徒
駭二太史三馬頰四覆鬴五胡蘇六簡潔七鈞盤

八南津其一則河之經流也先儒不知經流遂分
為簡潔為二按註云徒駭河地志云滹沱河寰宇

記云在滄州青池南許商云在平城二太史河南
皮縣三馬頰河元和志在德州安德平原南寰宇
記云在棣州商河北輿地記云卽馬篤河也四覆
鬴河通典云在德州安德五胡蘇河寰宇記云在
滄州饒安無祿臨津二縣許商云在東光六簡七
潔二河輿地記云在臨津八鈞盤河寰宇記云在
樂陵東南從德州平昌來輿地志云在樂陵九鬲
津河寰宇記云在樂東西北流入饒安商云在鬲
縣輿地記云在無棣鬴云府

次趙去極六十三度半入尾一十六度霍州趙城
及邯鄲廣平常山皆屬地

次魏去極六十四度半入尾一十二度今解州安
邑及魏郡大名府皆屬地

○西垣第一星曰韓上黨今潞州同州韓城及潁川
許州皆屬地

次楚去極北十三度入心一度楚有三楚江陵南
楚彭城西楚卽徐州吳郡東楚卽蘇州
次梁去極九十二度入心初度書禹貢云梁州之

域東據華山西距黑水餘見紫微垣主梁之下

次巴去極八十三度入房一度巴有三巴古巴子國中巴在巴縣又曰在重慶府巴西在綿州合州巴東在歸州夔州雲安等處皆是

次蜀去極八十度半入氏一十五度○蜀有三蜀蜀都卽成都漢高祖置廣漢爲蜀武帝置犍爲蜀次秦去極七十六度入氏一十二度半秦有三秦史記云三秦卽關中地也其一岐州雍縣其二桃林塞在長安東今華州黃關其三秦所置上郡卽

今綏德州也或以爲項羽封秦降將章邯司馬欣董翳於關中號三秦者非是章邯都雍丘爲雍王司馬欣都棕陽爲塞王董翳都高奴爲翟王

次周去極七十一度半入房初度西周屬扶風岐山東周屬河南府洛陽

次鄭去極七十一度入房三度在河南滎陽汜水次晉去極七十度入心一度今山西平陽曲沃絳縣皆其屬地

次河間去極七十八度半入心四度半今河間府

古瀛州

次河中去極六十六度半入尾初度今山西蒲州屬地

占曰天市星明則市吏急商人無利忽然不明反彗孛守主徙市易都客星入大兵起主有貴人喪木守糴貴流星出入主征商稅無厭商人受虐彗孛抵祀商民有以稅虐生叛逆者

市樓六黑星距東南去極九十八度入尾一十二度在天市中主交易一曰市府主市價律度市價

謂之長短輕重多寡大小為價值也書舜典六律

度量衡律為十二律陽為六律陰為六呂凡十二管皆經三分有奇空圍九分而黃鍾之長九寸大呂以下律呂相間以次而短至應鍾而極焉以之制樂而節音聲以之審度而度長短則九十分黃鍾之長一為一分而十分為寸十寸為尺十尺為丈十丈為引此律度之大槩

其陽為金錢其陰為珠王陽律為金為錢陰呂為珠為玉

占曰市樓司闐闐市價其星欲忽忽不明太明則
賦稅重不見則市更不理搖動則市價高下不定
不則兵起於市市有禍害疎折則稅官分路害天
下商賈商人分路告天下稅官商賈不通相離而
疎彗孛守犯則商稅暴虐橫征叛土者兵起
車肆二黃星距西大星去極一百度入尾三度在
天市南門內爲百貨貿易白赤曰主車駕又曰主
衆賈之區行貨曰商居貨曰賈區處也

占曰車肆明則吉不見則車蓋車駕盡行彗孛守
犯則兵車盡發亦曰商賈以稅受虐

宗正二星距西去極八十五度入尾一十六度在
帝座東南宗大夫也司宗室臣宗室天子之近親
屬

占曰宗正明吉宗室有秩序不見則宗正有事變
彗孛守犯則宗正有謀逆客星守犯天子不親宗
族又曰貴人死兵起

宗人四星距大星去極八十五度入箕一度在宗
正東主錄親疏享祭祀言紀錄天子親疏之次序

享奉上也言主奉上之儀物今之宗人府是
占曰族人有序則星綺文而明正動搖則天子外
親戚有疏遠之意彗孛守犯宗室逆謀兵起客星
守宗枝不利

宗星二星距北去極八十度入箕一度在宗人東
北主宗枝之臣宗族也李淳風云帝輔血脉之臣
占曰宗星明則宗人有序疎折則宗族携貳客星
守則宗族不和彗孛干犯則宗族謀逆兵起

帛度二黃星距西去極六十九度少入箕三度在
宗星東北主度量買賣平貨貿易度有五所以度
布帛也一曰分一蠶之絲爲忽忽十爲絲絲十爲
毫毫十爲厘厘十爲分二曰寸十分爲寸三曰尺
十寸爲尺四曰丈十尺爲丈五曰引十丈爲引量
有五所以量穀粟也一曰龠六十黍爲圭圭四爲
撮千二百黍爲龠二曰合合龠爲合謂兩龠也三
曰升十合爲升四曰斗十升爲斗五曰斛十斗爲
斛又曰石
占曰帛度明則尺量平商人不欺彗孛守犯則絲

帛布貴米大貴天下饑寒主禮

帝座一星去極七十五度入尾一十度在天市中
爲天庭又曰神農之所居神農掌稼穡也孟子滕
文篇云有爲神農之言者註云神農炎帝神農氏
始爲耒耜教民稼穡者也

占曰帝座人主之象帝王之位也光明潤澤吉威
令行不見則王道失天子憂天下亂兵起移出垣
外天子出遊月犯女主作姦金火犯臣謀姦彗孛
守犯人民大亂大臣憂兵起客星犯大人易政

屠肆二星距西去極六十八度半入箕三度在帛
度東北主烹宰庖饌之事庖厨也

占曰明大屠肆則市多宰殺不見魚肉貴

候一星去極七十八度半入尾一十六度在帝座
東北主伺陰陽又爲輔弼臣伺候也

占曰候星明大則輔臣強四夷歸化移徙則國不
安不見則輔臣失位彗孛守犯輔臣謀叛

宦者四星距南去極七十六度半入尾九度在帝
座西南侍御之近臣闈人也今之宦官太監是

占曰宦者微小吉明盛芒角則宦監弄權不見宦者凶金火守則宦者誅彗孛干犯則宦官專恣害朝市害民市禍亂天下商稅爲災兵起客星守犯則宦者滅亡

列肆二黃星距東去極八十六度入心三度在斛星西北主貨寶玉珍珠瑪瑙琉璃琥珀璧玉珊瑚之類

占曰成肆明吉移近帝座則王者貴珠玉而賤仁義近宦者則宦者貴寶玉近宗室則宗室貴寶玉各以寶玉相高各以寶玉賈禍理勢必然者

斗五星距東大星去極七十九度入尾六度半在宦者西南平量也

斛四星距西南去極八十六度半入尾三度在市樓北亦曰天斛主度量之數一曰主度量分銖之數

占曰斗斛明則歲熟不明則歲歉不見則歲大饑人相食斗斛不用覆則歲凶仰則歲穰大星干犯歲旱糴貴十倍旦主燒倉廩米穀水星守主澇彗

管子卷之二十一
守守犯天下兵荒饑饉相望於道路木星守天下
大豐

貫索九星距大星去極六十度入氏一十三度在
七公前一曰連索一曰句園言其形如連環一曰
天獄一曰天牢賤人之牢也主法律禁暴強正義
云九星悉見則獄事煩不見則刑簡又曰索中星
實則囚多虛淨則囚出易噬嗑象云先王以明罰
勅法此主法律禁姦除暴

占曰貫索主繩姦禁暴索口一星爲門欲其開也
口開則有赦口閉及星入其中有自繫歿者搖動
則斧鉞用中空則改元無囚七星見小赦六星見
大赦牢星直抵織女天下有急徵布帛之令移入
漢中則大饑荒人相食兵起月犯貫索則妃后下
獄金火守則大臣下獄流星出入貫索則有赦彗
孛干犯貫索則大臣奸叛下獄

七公七星距西去極四十七度半入氏初度在招
搖東三公之象天相也張衡云七星橫列貫索之
曰主議政教執刑法以別善惡之官

張衡漢人書洪範入政一食勸農業也二貨資用
物也三祀敬鬼神也四司空主空土以居民也五
司徒主教民以禮義也六司寇主無縱奸盜也七
賓主禮賓客也八師簡師所任必良士卒必練也
周禮地官大司徒以十二教訓民一曰以祀禮教
民敬則民必敬二曰以陽禮教讓則民不爭三曰
以陰禮教民親則民不怨四曰以樂禮教民和則
民不乖五曰以儀辯等則民不越六曰以俗教安
則民不偷七曰以刑教中則民不暴八曰以誓教
恤則民不怠九曰以度教節則民知足十曰以世
事教能則民不失職十有一曰以賢制爵則民慎
德十有二曰以庸制祿則民興功也書周官司寇
以五刑糾萬民一曰野刑上功糾力也二曰軍刑
上命糾守也三曰鄉刑上德糾孝也四曰官刑上
能糾職也五曰國刑上憲糾暴也周禮夏官大司
馬之職掌建邦國之九法以佐王平邦國制畿封
國以正邦國設儀辯位以等邦國進賢興功以佐
邦國建牧立監以維邦國制軍詰禁以糾邦國施

貢分職以任邦國簡稽鄉民以用邦國均守平則以安邦國比小事大以和邦國

占曰七公皆明則輔相周議臣忠刑憲清國法平差戾則獄多冤酷不明則疑獄不決移入河中則法官不職禁孛守犯則宰相專權枉法忠良國危兵起

天紀九星距西去極

度入

度在貫索

東九卿之象又主九河爲萬事之紀綱理冤訟

九卿九河解見前

小爲紀大爲綱詩小雅棫樸篇云

勉勉我王綱紀四方禮記月令云仲春天子命有司省囹圄去桎梏毋四掠正獄訟

占曰天紀明則天下多獄訟微暗則政理刑清禁孛犯則大臣恃權作奸兵起金火守大臣下獄

女牀三星距西去極五十二度半入尾十四度在天紀北爲后宮御女侍從主女事

占曰女牀明則宮人恣意居常吉暗則后宮不安失列則嫡妾無序搖動則后妃有憂不見則多病疾金火守則妃嬪有誅戮禁孛守犯則妃后有謀

管窺輯要 卷之二十一
逆凶禍客星守犯則奸人亂宮者妖星守女牀則
后宮必爲妖氛所悞主惑君氣入色黃有喜白喪
黑病

天市垣列座

帝座

帝座一星在天市垣中候星之西天庭也人主之
象巫咸曰帝座一星神農所居石氏曰帝座天位
也天之貴神張衡曰帝座者帝王之位也帝座有
五一在北極一在紫微一在太微一在天市一在

天角一在心中中央皆王者所居其星欲光明潤澤
則天子威德行微小則天子弱暗不明則王道失
星亡則天子憂天下亂兵起

月犯帝座人主憂○五星犯帝座臣謀君天下亂
兵起人主憂○火星犯帝座有逆亂有自立者有
徙王不出一年客星犯帝座人民亂宮廟徙臣侵
君○赤星守帝座朝廷有兵○流星抵帝座諸侯
兵起臣謀主有更令○流星出帝座天子使出以
色占其事以星所之占其國○彗孛犯帝座人民

大亂宮廟徙天下更令

候星

候一星在天市中帝座東北土官也主候陰陽伺
 遠國夷狄以知其謀又時變貨財安靜而明則萬
 國同豐王道行輔臣強微小不明則輔臣王道衰
 星移主不安星亡主失位○月犯候星弼臣有憂
 死○歲星犯天候陰陽不和五穀傷大饑兵起守
 之同占火土金水犯守亦同占○客星入天候士
 卒疲人有急行出天候天下兵起相攻守之外客

欲為主天下亂○流星抵候星兵起近臣相攻夷
 狄內侵王者憂彗孛犯候星兵起天子宗族憂國
 易政○彗孛出候星天子宗族相攻天下亂士卒
 有急行大臣反

宦者

宦者四星在帝座西南帝旁之闈人也其星欲微
 則吉明盛則宦豎弄權不見則闈宦憂○月犯宦
 者侍臣誅戮不出其年○五星犯宦者天子左右
 侍臣有誅者不出其年守同占○客星犯宦者宦

者滅亡○客星守宦者貴人不能守其位一日貴人讓物流星入宦者宦者憂抵之宦者誅○彗孛出宦者宦者謀作亂犯之宦者誅○黃氣入宦者宦者受賜赤氣入宦者宦者誅黑氣入宦者宦者死赤氣出宦者宦者作奸蔽主

宗正

五星犯守宗正左右羣臣多死有更令人主憂客星守宗正天下更令一日人君不親宗族出宗正若守之不去帝族羣臣多死○流星入宗正左右

貴人多死宗正若后族有黜棄市者流星貫宗正人主棄其宗族○彗孛出宗正王者不親宗族人謀亂其國亡犯之宗正憂

宗人

宗人四星在宗正東主恩享宗正宗人大宗小宗之象也其星明正則族人有序人主康寧動搖則宗族不和天子親族有變事離折則族人離○五星犯守宗人天子親族貴人有憂若死者一日宗族有離絕者客星守宗人貴人有死者○客星出

宗人天子親族多矣一曰王者不親宗族宗人不和○流星入宗人天子親戚爲亂一曰宗族中有變事親戚離不出其年彗孛出宗人占同宗正

宗星

宗星二星在宗人東北候星之東主先人祠享主別親疎宗室之象也其星明而相近則帝宗相親離析則宗人携貳若有謀者天子惡之宗星明族人有序暗則宗室衰弱○五星守犯宗星宗室大臣有分離者○流星抵宗星王者不親宗族宗室

相疑以親爲疎一曰宗人有變事○彗孛犯宗星宗人離出之占同宗正

帛度

帛度二星在天市中宗星東北主度量平貨交易星明大則尺度平商人不欺不明則反是○客星彗孛犯守帛度絲帛大貴

屠肆

屠肆二星在帛度東北主屠宰其星亂暗則魚肉貴

列肆

列肆二星在斗星西北主市貨星移徙則市肆不安五星守列肆市肆兵起

斗星

斗五星在天市中宦者西北主平量星明則吉不明則五穀不成星亡則歲大饑人相食斗斛不用覆則歲熟仰則天下升斗不平○熒惑守市斗糴貴入其中大貴石氏曰斗斛不平吏有罪○流星抵斗斛權量不平市吏有憂一日五穀貴斗斛不用○彗孛出斗斛斗斛不用天下大亂人饑流亡

斛星

斛四星在市樓北斗星南一曰天斛主度量占同斗木星守之則得忠臣陰陽平

車肆

車肆二星在天市中南門內主車駕負重之區主百貨其星明則吉暗則國車盡行○客星彗孛守車肆天下兵車大動

市樓

管子卷之二十一
市樓六星在天市門之上天子之市府也主闡闡
司市價肆度其星欲忽然不明大則賦歛重大暗
則市吏不理星移動則市價殊不具則兵作於市
狄人入中國以兵相害不見則國政亂市樓亡天
下易政市樓陽爲金錢陰爲珠玉星不備天下幣
大亂有變動則各以其所主占之熒惑乘市樓天
下易弊○客星彗孛犯守市樓皆市中兵起

七公

七公七星在招搖東橫列貫索之口天子輔相主
疑議石氏曰七公者三公廷尉之象主執法別善
惡之官其上星上公也次星中公也下星下公也
七星皆明輔相周星大齊明則輔臣忠國法平差
戾則獄多冤酷微細不明則疑議不決人主憂連
貫索天下亂移入河中人相食五星守七公民饑
君不安輔臣有謀議相疑若有誅者火星守七公
天下亂兵起○客星守七公天下饑君不安客星
出七公將相憂御人戮議臣作罪直言者凶○流
星入七公人主信讒殺直臣凶人起兵義人受誅

流星經七公兵將出○彗孛犯七公宰相三公受
誅一曰忠言者受殃

貫索

貫索九星在天市垣外七公之前一曰連索一曰
連營一曰天圍亦謂之天牢賊人之牢也土繩奸
律暴其口北間謂之牢戶中央大星牢監也中小
星不欲其多星多則囚多星少囚少牢中無星則
獄空牢戶開則有赦迫促不開則刑獄煩酷牢間
左右徙倚不居其處若不見不出十八日有大赦

牢星直抵織女有急徵布帛之令星移入漢中則
大饑人相食兵起天牢九星皆明天下獄煩一星
不見則奸人入二星不見則小赦三星不見則大
赦動搖則斧鉞用一曰天牢中空則改元若開口
及星入牢中則獄有繫死者又曰恒以六子日夜
候貫索一星不見小赦二星不見賜祿三星不見
人主德令行且赦甲期八十日丙期七十日戊期
六十日庚期五十日壬期四十二日犯貫索天下
獄不平○月暈貫索不出四年有內禍匿謀之事

○歲星犯貫索天下亂多獄事兵大起貴人有死
者○歲星犯乘守天牢天下獄不平一日以殺爲
亂熒惑入貫索天下有賊旱一日水災歲饑人相
食有赦火犯乘貫索天下獄多不平○火守貫索
獄囚多寃大旱名水絕有赦守二十日小赦三十
日已上大赦巫咸曰天下亂多獄事兵起人多死
○鎮星犯貫索天下獄多不平亂兵起貴人死○
太白犯守貫索以獄起兵大人憂巫咸曰天下亂
多獄事兵起貴人有死者○辰星犯貫索刑獄煩
多兵起天下亂○客星犯貫索有赦石氏曰必有
大獄民叛君亡不出三年客星入貫索天下多死
人色黃諸侯有以土地坐法者出貫索有赦一日
國亡地大臣謀叛貴人下獄○客星守貫索有赦
守之久大赦守三日卽去小赦○流星入貫索大
下有大獄多死者一日女主死有兵出流星犯冲
貫索人饑疾病王者大憂○彗孛出貫索大臣有
反者有大赦○蒼白氣入貫索中天子憂亡地出
之禍除○赤氣入貫索中有內亂兵起黑氣入貫

索大人忌之黃白氣入貫索天子有喜一曰諸侯有以地賂天子者出貫索天子以地賜諸侯○赤白氣入貫索多枉死赤氣出貫索內兵出

天紀

天紀九星在貫索東九卿也又爲九河一曰天緯主紀萬事理寃訟九星齊明則王法無偏天下無怨散亂則紀綱亂有易政死王若山崩地震暗小則天下獄訟不理星亡則國法壞亂一曰天紀與女床合王者淫亂國亡一曰天紀入漢則人相食

○歲星犯天紀幸臣執權有兵起王者憂○熒惑犯天紀天下兵起相攻鄰萌曰火舍天紀西人饑相食舍其五穀不實舍北木菓不實舍南天下戰火犯守天紀天下亂地震山崩有亡國○熒惑守天紀天下相攻擊人饑君不安幸臣執權兵起○鎮星犯天紀占同歲星○太白犯天紀若守之有兵亂石氏曰幸臣執權兵起王者憂一曰大旱大饑大臣爲亂兵起宮中辰星犯守天紀占同太白○客星入天紀有拘主諸侯舉兵天下亂出天紀

臣執權宮中有兵強臣相戮人主憂不出二年行
歷天紀天下紀君不安之守之占同○彗孛犯天
紀地震天下國相伐○彗孛出天紀天下怨訟不
理石氏曰大臣亡○流星入天紀臣爲亂兵起宮
中后妃出走

女床

女床二星在天紀北後宮女御也爲嬪妾所居之
宮主侍從宮官其星大小相承則后妃安後宮吉
微暗後宮不安明暗失列則嫡庶無序明大芒角

則宮女放恣動搖則後宮有憂不見則后妃多病
○五星守女床後宮有奸謀兵起宮中妃暴誅遠
期一年○客星犯女床貴人誅○客星入女床有
妖女來惑天子者天下女子有憂守女床強臣執
國命後宮女有凶○流星入女床后宮女有暴誅
者○彗孛犯女床後宮有挾客者后妃有凶出女
床宮人謀主○黃氣出女床後宮女子喜青氣出
女床有病者白氣入女床後宮有喪黑氣入女床
有死者○赤氣入女床後宮有兵

管子地員篇卷之二十一終

